

Ngaahi me'a-va'inga 'oku sai'ia taha ai 'a Mātini

Fai 'e J. Ryan Jensen

Ngaahi Makasini 'a e Siasí
(Makatu'unga 'i ha talanoa mo'oni)

"Foaki hangē ko Sīsū 'o foaki kotoa"
(Tohi Hiva 'a e Fānau, 116).

Na'e ongo'i loto-mamahi 'a Mātini 'i he taimi ne tala-ange ai 'e he'ene ongomātu'á 'e hiki 'a e fāmilí ki ha kolo kehe 'i Kolomupia. Na'e 'ikai ke ne fie mavahe mei hono ngaahi kaungāme'á, li'aki hono 'apí, mo e feitu'u na'á ne tupu hake aí. 'E nofo ofi leva 'a Mātini ki he tahí, mo e 'ea vela mo 'afu 'i he ta'ú kotoa kae 'ikai ko e 'ea mokomoko mei he mo'ungá. Te ne fakafetongi e supo velá 'aki ha inu mokomoko, mo e koté ki ha talausese mutú. 'Ikai ngata aí, 'e 'alu ki ha ako fo'ou, uooti fo'ou, mo ha kalasi Palaimeli fo'ou. Ne hangē na'e ki'i ngali fakailifía.

'I ha 'aho 'e taha na'e 'eke ange 'e Mami mo Teti kia Mātini pe 'oku fēfē 'ene ongo'i fekau'aki mo e hikí.

Na'e talaange 'e Mātini, "Oku 'ikai ke u sai'ia au ai. 'Oku 'ikai ke u fie ma'u ke liliu e me'a kotoa."

Na'e talaange 'e Teti, "Oku ou 'ilo 'e faingata'a 'a e hikí. 'E liliu ha ngaahi me'a lahi, kae 'ikai ko e me'a

kotoa pē. Te ke kei ma'u pē kimaua!"

Na'e pehē 'e Mātini, "Mo'oni ia."

Na'e pehē 'e Mami, "Pea te ke kei ma'u pē ho'o 'ū me'á."

Na'e ki'i fakakaukau ki ai 'a Mātini. Te ne kei ma'u pē 'a hono valá, 'ū suú, mo ha ngaahi me'a kehe na'á ne anga ki ai 'i hono fale motu'á—tautautefito ki he'ene 'ū me'a-va'ingá. Na'e fiefia 'a Mātini te ne lava 'o 'ave 'a e 'ū me'a-va'inga 'okú ne sai'ia taha aí. Na'á ne fa'o fakalelei kinautolu 'i he'enua hikí.

Hili ha ki'i taimi si'i, na'e kamata ke anga 'a Mātini ki hono 'apí mo e kolo fo'ou. Na'á ne fiefia na'e 'ikai fu'u faingata'a pe fakailifia 'a e hikí 'o hangē ko 'ene fakakaukau.

Pea 'i ha 'aho Sāpate 'e taha, 'i he 'alu e fāmilí 'o Mātini ki he lotú, na'á ne fakatokanga 'i ha kakai toko lahi na'e te'eki ke ne mamata ai kimu'a. Na'e fonu e Palaimeli 'i he tamaiki fo'ou. Na'á ne fifili pe na'a nau omi mei fē. Na'á ne fanongo ki he talanoa ha kakai na'á ne 'ilo'i fekau'aki mo hono foaki ha me'akai, vala, mo e 'ū sū. Hili e lotú, na'e fehu'i 'e Mātini kia Mami fekau'aki mo e kakai fo'ou.

Na'e pehē 'e Mami, "Na'e pau ke nau mavahe mei honau fonuá. "Ko e toko-lahi 'o kinautolu ne nau li'aki e me'a kotoa, pea 'oku 'ikai ha'anau me'a 'e ma'u he taimí ni."

"Ko e 'uhinga ia 'oku fie tokoni ai e tokotaha kotoa kiate kinautolú?" Ko e fehu'i ange ia 'a Mātini.



"Ko ia. Na'e ako'i kitau-tolu 'e Sīsū 'oku totonu ke tau tokoni ki he kakai 'oku faingata'a'ia. Te tau lava 'o muimui ki He'ene sippingá mo vahevahe 'a e me'a 'oku tau ma'ú."

Na'e fakakaukau 'a Mātini ko ha me'a lelei 'eni ke fai.

Na'e pehē leva 'e Mami, "Ko e toko lahi e tamaiki 'i he Palaimeli 'oku hao pē 'enua me'a 'oku ma'ú 'i ha ki'i kato áfei. Na'e pau ke nau li'aki 'enua 'ū me'a-va'ingá. 'Okú ke pehē te ke lava 'o foaki ha ni'ihí ho'o me'a-va'ingá?"

"'Ikai! Ko e ngahi me'a-va'inga ia 'a'aku!" Ko Mātini ange ia. Na'á ne tafoki 'o lele ki hono lokí.

Na'e sio takai 'a Mātini 'i hono lokí mo 'ene lo'imata'ia. Na'e 'ikai ke ne loto ke foaki 'ene 'ū me'a-va'ingá. Na'á ne 'omi kotoa ia mei honau fale motu'á!

Na'á ne 'alu ki he'ene puha me'a-va'ingá pea sio ki loto. Na'á ne sio ki he'ene loli me'ava'ingá, *trompo* (me'a vilovilo), ko 'ene kato mapu lelei tahá, mo e ngaahi me'a-va'inga lahi kehe na'á ne sai'ia taha aí. Na'á ne sai'ia kotoa ai. Na'e 'ikai ke ne lava 'o foaki ha me'a 'e taha!

Na'e fakakaukau leva 'a Mātini, "Fēfē kapau na'e pau ke u li'aki hoku 'apí mo e me'a-va'inga 'oku ou sai'ia taha aí?"

Hili ha ngaahi miniti si'i mei ai, na'á ne 'alu kia Mami kuo fonu hono ongo nimá 'i he 'ū me'a-va'ingá—'o 'ikai ko ha

me'a-va'inga motu'a pē—ka ko e 'ū me'a-va'inga na'á ne va'inga ma'u pē mo íá.

Na'e 'ohovale 'a Mami. "Oku 'ikai fie ma'u ia ke ke foaki kotoa ho'o me'a-va'inga 'okú ke sai'ia taha aí."

Na'e tuku 'e Mātini e 'ū me'a-va'ingá 'i he falikí. Na'á ne pehē, "Na'e 'i ai foki mo ha me'a-va'inga ne sai'ia taha ai e fānau kehé. 'Oku ou loto ke nau ma'u 'eku me'a-va'ingá ke nau ki'i fiefia ange ai."

Na'e fā'ofua 'a Mami kia Mātini. "Oku ou laukau 'aki koe."

Na'e ongo'i loto-māfana 'a Mātini. Na'á ne 'ilo'i ko e foaki ki he ni'ihí kehé ko ha me'a 'e fai 'e Sīsū, pea na'á ne fiefia ai. ●



FANGA KI'I NGĀUE FAINGOFUA

"Fakataunge ke tau fakahā 'etau 'ofa mo e houngā'ia 'i he . . . Fakamo'uí 'aki 'a e fanga ki'i ngāue 'ofa mo e tokoni ki hotau ngaahi tuonga'ane mo e tuofāfine 'i 'apí, 'i he siasí, pea 'i hotau tukui koló."

Palesitani M. Russell Ballard, Palesitani Le'ole'o 'o e Kōlomu 'o e Kau 'Aposetolo 'e Toko Hongofulu Mā Uá, "Ko Hono Ma'u e Fiefiá he Tokoni 'Ofá," *Liahona*, Mē 2011, 49.

